

Rihezia extraordinaria dallas spezias e grond interess dils purs

Facit positiv suenter igl'emprems campiunadi da praus el Parc natural Beverin

■ (anr/sr) A caschun dalla fiasta dil parc natural che ha giu liug ils 4 d'october ha il campiunadi da praus el Parc natural Beverin anflau siu punct culminant cun l'undraziun dils victurs. Damai che tuttas surfatschas valetadas ein vegnidas taxadas sco extraordinari rehas da spezias han ils organisaturs premiau en mintga categoria ils sis emprems plazs enstagl sco previu mo treis. La premiaziun dil campiunadi da praus el Parc natural Beverin ha giu liug a caschun dalla fiasta dil parc natural a Tschappina. Malgrad ch'ei ha pluviu ed era plitost freid eran ils bauns da fiasta per la premiaziun occupai tuts ed in publicum spanegiau spetgava ils resultats. Dalla giuria dil fatg ch'ei stada responsabla per la valetaziun dallas surfatschas

han fatg part: *Peter Weidmann* (Ökobüro Atragene), *Paul Urech* (anterior cusseglader puril) ed *Erica Nicca* (Parc natural Beverin). Ils commembers dalla giuria han ludau l'enorma rihezia dallas spezias da tuttas surfatschas annunziadas pil campiunadi e rapportau dalla gronda lavur da valetar las 62 surfatschas.

Premiau ils emprems sis

Pil campiunadi da praus han las puras ed ils purs ord las vischnauncas dil Parc natural Beverin mintgamai saviu annunziar lur pli biala surfatscha per las categorias «praus extensivs» e «praus pauc intensivs». Sco ils organisaturs menziunan en in communicau als mieds da massa eis ei denton semussau duront l'evaluaziun dils praus annunziati che tut quels pon



Il victurs ella categoria «praus pauc intensivs» digl'emprems campiunadi da praus dil Parc natural Beverin: Hans Peter Bandli, Burga Simonett, Gieri Christ Fravi, Ruedi Mark, Werner Sutter e Christian Clopath (da sen.).

FOTOS MAD

vegnir taxai sco specialmein rehs da spezias. Quei era en cumparegliaziun cun l'entira Svizra e perquei crodi la rangaziun ora cun fetg pintga differenza. Perquei ein ils emprems sis plazs per categoria vegni premiau enstagl dils treis emprems sco previu. Il victurs dalla categoria «praus pauc intensivs» ein: *Hans Peter Bandli*, Stussavgia (1. plaz), *Martin Simonett*, Lon (2. plaz), *Gieri Christ Fravi*, Cati-Vargistagn (3. plaz), *Ruedi Mark*, Maton (4. plaz), *Werner Sutter*, Maton (5. plaz) e *Christian Clopath*, Lon (6. plaz). Victurs ella categoria «praus exten-

sivs» ein: *Willy Dolf*, Casti-Vargistagn (1. plaz), *Simon Buchli*, Stussavgia (2. plaz), *Ruedi Mark*, Maton (3. plaz), *Beat Beeli*, Maton (4. plaz), *Leo Rüedi*, Tschappina (5. plaz) e *Richard Cantieni*, Casti-Vargistagn (6. plaz).

Facit positiv

Suenter igl'emprems campiunadi da praus ei il facit dils organisaturs trasatras positivs. Sper ils praus cun ina rihezia extraordinaria dallas spezias ein ils organisaturs oravontut selegrai dil grond interess dils purs. Il campiunadi seigi staus ina

pusseivladad da far attents all'impurtonza dils praus cun biaras spezias e da honorar l'agricultura cun renconuschientscha per la premura e gronda lavur da cultivar. L'Uniu da purs da Schons, Pro Stussavgia, Pro Natura ed il Parc natural Beverin pon tuttavia s'imaginar da puspè organisar ils proxims onns ina tala concorrenza.

Ulteriuras informaziuns e l'entira rangaziun ein d'anflar sin las paginas d'internet: www.wiesenmeisterschaft.ch e www.naturpark-beverin.ch/wiesenmeisterschaft.



Il victurs ella categoria «praus extensivs»: Willy Dolf, Simon Buchli, Ruedi Mark, Richard Cantieni, Leo Rüedi e Beat Beeli (da sen.).